

Dus chatschadurs s'entaupan sper il furmicler

«Jau hai vesì il luf-tscherer» – cun questa nova pon be paucs chatschadurs turnar a chasa

■ **(anr/vi) Per in èsi stà ina gronda surpraisa. Per l'auter betg. Ils dus chatschadurs èn s'entupads l'emna passada sin il Con oradim la Val Sumvitg. Theophil Nay era sin via dad ir sin ses post da chatscha.** Igl era il mardi encunter saira. Giond da la «cua dal Con» si vesa el il luf-tscherer. Lez sesiva sper in furmicler e n'ha mussà nagina reacziun. Omadus chatschadurs èn stads quiets ed han observà ver tschintg minutas in l'auter. Lura ha Nay, che leva festinar per esser ad uras sin ses post, fatg smanis per spaventar il «grond giat selvadi». Pacificamain è l'animal da rapina sa dauzà ed è s'allontanà plaunsieu en direcziun da Laus. Nay ha pudì cuntinuar ses viadi vers Cuolmet.

Acceptar navidas

«Quel stuvain nus natiralmain acceptar», di Nay e cuntinuescha: «Ma betg gugent.» Già avant la sentupada cun il luf-tscherer aveva Nay observà che las selvaschinas eran pli malruassaivlas ed attentas che uschiglio. «Jau hai gi dubi ch'il luf-tscherer saja denturn. Jau avev udi



Il luf-tscherer giada anc adina pitschna simpatia tar ils chatschadurs. 10

ch'insatgi haja vesì el entadim la Val Laus.» Malgrà tut quests indizis è Nay tuttina stà fitg surstà cura ch'el ha lura

propi vesì l'animal avant sai. Quai che Nay smirveglia anc oz – plirs dis pli tard – è che quest animal lascha vesair sasez senza nagins problems. «El sesiva e guardava sin mai pacificamain. S'allontanà è el pir cura ch'jau hai smanà duas u trais giadas cun il maun. Ma el è lura ì be bufatg, bufatg. Quel n'è nuota fugì.» «Quai è in grond», accentuescha Nay. I saja in tier fitg robust e ferm. «Sch'ins pensa che tals animals mangian ver 40 en fin 50 animals pitschens en in onn, lura na ston ins betg pli trametter ils chatschadurs a chatscha. Lura san ils lufs-tscherers prender la patenta.» Nay precischescha dentant sez: In luf-tscherer na gjaja betg per tschiervs u chamutschs. Nun ch'i fiss in animal malsaun. El fetschia chatscha sulet sin tiers manidels. Era sche Nay sa sez bain avunda tut quai, resenta el – sco blers auters chatschadurs – quest animal sco ina tscherta concorrenza.

«In bel animal, ma...»

Nay ha già vesì il luf-tscherer ch'è expunì en il Museum da la natira a Cuir. Il luf-tscherer dal Con saja pli stgir.

Sch'i era ina mastgel u ina femella na po Nay betg dir. Il chau pariva al chatschadur fitg grond e sin fundament da gliez, schess el plitost ch'i saja in mastgel.

«Igl è in bi tier. Ma jau sco chatschadur na sun betg inchantà da la chaussa.» Igl è enconuscent che tals animals da rapina van lungas distanzas. Tuttina suspecta Nay ch'il luf-tscherer saja betg vegnì a moda natirala en Val Sumvitg. Insatgi haja forsà mess ora quai animal da notg ed a moda dascusa, è ina teoria dal chatschadur.

Ina preda unica

Ha Nay lura era temì il luf-tscherer? «Na, na, patertgai temer!» respunda Nay cun vusch profunda e datscherta: «Gliez stuess schon esser in uors per far temair mai.» Malgrà tut ils sentiments ambivalentes discorra Nay sa chapescha era d'in «tschert plaschair» d'esser in dals emprims chatschadurs en Surselva che ha dastgà contemplar il luf-tscherer uschè ditg ed uschè datiers. Cun ina tala regurdientscha da chatscha turnan be paucs a chasa.